

**CONSELLERÍA DE PESCA E
ASUNTOS MARÍTIMOS**

Decreto 86/20077, do 29 de marzo, polo que se derroga o Decreto 438/2003, do 13 de novembro, polo que se aproba o Plan Básico de Continxencias por Contaminación Mariña para a defensa dos recursos pesqueiros, marisqueiros, paisaxísticos, acuícolas e ambientais de Galicia.

A aprobación por parte do Consello da Xunta de Galicia, o día 16 de novembro de 2006, do Plan Territorial de Continxencias por Contaminación Mariña de Galicia, logo de obter o visto e prace da Comisión Galega de Protección Civil, aconsellan derrogar o primitivo Plan Básico de Continxencias, recollido no Decreto 438/2003, do 13 de novembro e a Orde do 26 de outubro de 2004, que nace coa intención de achegar un primeiro instrumento nesta materia, aínda que na mesma introdución da orde xa se recollía no punto 1.5, a interacción con outros plans, entre eles, no punto 1.5.3, o plan territorial.

O Plan Básico de Continxencias por Contaminación Mariña para a defensa dos recursos pesqueiros, marisqueiros, paisaxísticos, acuícolas e ambientais de Galicia, do ano 2003 e a Orde do 26 de outubro de 2004, pola que se publica o Primeiro Plan de Continxencias por Contaminación Mariña nas Rías de Galicia, perden a súa razón de ser, xa que a aprobación do Plan Territorial os incluíría nos seus contidos e aínda que a propia Orde do 26 de outubro de 2004 recollía a interrelación con outros plans de continxencias, non parece razoable manter dous diferentes cando un deles inclúe e mesmo aumenta os contidos do anterior.

Coa aparición do Plan Territorial incorreríase en redundancia por conter basicamente a mesma información, aínda que ampliada neste último, o que é motivo das derogacións consideradas neste decreto.

Polo tanto, en virtude do disposto no artigo 34.5º da Lei 1/1983, do 22 de febreiro, reguladora da Xunta e do seu presidente, por proposta da conselleira de Pesca e Asuntos Marítimos, e logo de deliberación do Consello da Xunta de Galicia do vinte e nove de marzo de dous mil sete,

DISPOÑO:

Artigo único.-Derrógase o Decreto 438/2003, do 13 de novembro, polo que se aproba o Plan Básico de Continxencias por Contaminación Mariña para a defensa dos recursos pesqueiros, marisqueiros, paisaxísticos, acuícolas e ambientais de Galicia e a Orde do 26 de outubro de 2004, pola que se publica o primeiro Plan de Continxencias por Contaminación Mariña das Rías Galegas.

Disposición derradeira

Este decreto entrará en vigor o día seguinte ao da súa publicación no *Diario Oficial de Galicia*.

Santiago de Compostela, vinte e nove de marzo de dous mil sete.

Emilio Pérez Touriño
Presidente

Carmen Gallego Calvar
Conselleira de Pesca e Asuntos Marítimos

III. OUTRAS DISPOSICIÓNS**VICEPRESIDENCIA DA IGUALDADE
E DO BENESTAR**

Orde do 27 de abril de 2007 pola que se establecen as bases que rexen as axudas para actividades realizadas por escolas de tempo libre e se procede á súa convocatoria.

O Estatuto de autonomía de Galicia establece no seu artigo 27.22º que lle corresponde á Comunidade Autónoma galega a competencia exclusiva nas materias do deporte e a axeitada utilización do lecer, así como a promoción do desenvolvemento comunitario.

Así mesmo, polo Decreto 285/1989, do 16 de decembro, asúmense as funcións e servizos transferidos pola Administración do Estado á Comunidade Autónoma de Galicia en materia de promoción sociocultural, no ámbito da xuventude e desenvolvemento comunitario.

Coa aprobación do Decreto 211/2005, do 3 de agosto, polo que se establece a estrutura orgánica da Xunta de Galicia, e co Decreto 232/2005, do 11 de agosto, a dos seus departamentos, establecendo no seu artigo 1 a estrutura básica da Vicepresidencia da Igualdade e do Benestar, que conta coa Secretaría Xeral do Benestar a que corresponde o exercicio das competencias e funcións en materia de xuventude, a través da Dirección Xeral de Xuventude e Solidariedade, desenvolvido polo Decreto 517/2005, do 6 de outubro.

Ante a importancia que hoxe adquire a organización de actividades de tempo libre e de utilización do lecer polos mozos e mozas, así como a axeitada formación dos responsables e técnicos de actividades de animación sociocultural, debe apoiarse o traballo que realizan as escolas de tempo libre existentes na nosa comunidade autónoma, en tanto que son centros recoñecidos oficialmente pola Vicepresidencia da Igualdade e do Benestar para impartiren esa formación específica.